

史部・傳記類

使西日記・味水軒日記・孫夏峰先

生日譜殘稿・呼桓日記・文文肅公

日記・司徒恩遇日記・祁忠敏公日記

北京圖書館古籍珍本叢刊

20

北京圖書館古籍珍本叢刊 20

史部·傳記類 使西日記·味水軒日記·孫

夏峰先生日譜殘稿·呼樓日

記·文文肅公日記·北征紀

行·司徒思適日記·祁志敏

公日記

編者 北京圖書館古籍出版編輯組
出版 書目文獻出版社

(北京天津街七號)

印刷 民航印刷廠太湖分廠

定價 壹佰柒拾貳元

ISBN 7-5013-1201-X/Z · 166

目錄

使西日記二卷	一
味水軒日記八卷	一九
孫夏峰先生日譜殘稿	三九九
呼桓日記五卷	四〇九
文文肅公日記二卷北征紀行一卷	五〇五
司徒恩遇日記二卷	五二九
祁忠敏公日記十五卷	五五九

使西日記序

正統庚辰

通議大夫戶部左侍郎毗陵邵寶撰

使西日記記使事也正德癸酉今致政內儀少卿姑蘇都君玄敬以禮部郎中奉冊封之命西使慶藩自京師至寧夏而復歷三時行數千里日記於是乎書比致政歸都水郎中謝君邦應方視水東吳見而梓之夫使之重於君子尚矣孔子論使嘗有取於專對不辱當是時列國交聘抗禮執言各愛其情故使之難如此今天下一國四方無虞其在海外亦惟一人是尊敬承惟謹苟無愆儀越度於使稱矣凡昔之所謂難者今於何有而君子猶是之重重命也抑致命之外有交際焉有臨觀焉有賦詠焉有聽采焉有考閱焉有感且弔焉交際可以觀義臨觀可以觀趣賦詠可以觀才聽采可以觀識考閱可以觀學感且弔可以觀情數者具而章則於天下何往非宜而獨使哉即使焉而當其

難亦何不可之有是故君子重使不惟其事惟其人不惟古人今之人皆然吾於君斯記也重嘉之君好古博物蔚然文儒使乎未足以盡君君平生所著亦不止是別有傳者茲不著

使西日記卷上

姑蘇都 穆

正德八年四月丁巳穆以禮部郎中與崇信伯費公被命冊封慶府壽陽王妃費公爲正使穆爲副使二十七日 陛辭晚出正陽門寓崇真道院時河南大參臧君瑞周以督餉至懷慶推官潘君希召以行取至偶爾同集臧君開宴歡飲盡醉

二十八日正陽門西南行四十里至盧溝河其水即古之桑乾上有橋長六十丈相傳金明昌初建橋之北有元太保劉秉忠墓三十里至良鄉縣其東門有岡隆然而起名遼石岡上有浮圖土人云金舊物也

二十九日發良鄉三十八里憩瑠璃寺瑠璃本名劉李遼乾統中石幢猶存其文可考後之人譌爲瑠璃云二里渡瑠璃河即古之聖水上有橋新建二十里至鋪旁公宇倦甚假寐十里至涿州

五月一日發涿州南行十五里至樓桑村相傳村中舊有桑高五丈許如車蓋然人異之因名其村曰樓桑今已不存八十歲老人言小時猶及見其根也村即漢昭烈故居其廟祀則始於隋後之人併祀關羽張飛名三義廟著於祀典正德辛未重建 詔賜其額曰三義宮製極宏麗中有唐乾寧四年碑午宮之主入宋高士出酒相款言後殿昭烈像元劉總管所塑母歲三月廿三日爲昭烈生辰鄉人拜謁致奠者甚衆出宮西南三十里至定興縣

二日發定興十里至白溝河乃宋與遼分界之處六十里至安肅縣

三日發安肅十五里渡曹河三十五里至保定府訪張鳳舉太守鳳舉維揚人予鄉舉同年也時以疾不蒞事留小飲予與鳳舉契闊數年不覺霑醉午後微雨雨止過大宗伯傅公家

西日發保定四十五里憇涇陽廢驛四十五里至慶都縣入察院聞東北有堯母祠亟謁之祠隘甚中爲塑像無守之者後有丘逼於城高與之齊相傳即堯母塋處俗謂之堯母臺祠舊在臺上景泰七年知縣事唐復始遷臺下歐陽公集古錄據後漢堯母碑以爲與堯同葬濟陰城陽城陽即山東之莒州隸青州府今府治西北有堯山山上有祠而堯陵乃在東平州東北三十里元學士郝伯常堯帝廟碑云伊祁山堯母所居葬於慶都曰慶都陵又曰慶都堯母之名也今中山永平之西水出伊祁口越蒲陰爲祁水而州曰祁永平之南有故城曰堯城故有廟有碑言堯生於此永平之東有縣曰慶都而無山永平之西有縣曰唐有碑言初封唐縣其故國也有水出於常山之西北曰唐水東合於祁水以是徵之蓋堯生於此始受封焉其母殂落葬之此及其爲帝則都平陽也伯常大儒其考

訂必精則此地真堯母所葬無疑矣一統志示云堯母墓在慶都

五日發慶都六十里至定州入州學謁韓魏公祠蓋公嘗帥定故祀之祠之碑有王囑叟記及公遺事并尚書省劄學有東坡先生雪浪石黑質白章盛以石盆盆爲芙蓉之形其唇有東坡銘今半已剝落盆北碑刻雪浪齋三大字學又有東坡書杜牧之詩松醪賦及元李雪菴大字石刻午憇察院作詩一絕書壁上五十里至新樂縣金知縣公綬以鄉曲故攜蒲酒酌予夜深始別

六日發新樂九十里至真定府李太守蘊玉予進士同年聞予至出迓時都憲林公粹夫以巡撫寓其地往謁之旣而林公來顧遂入府謁李同年具酒請遊龍興寺寺在府治東二里舊名龍藏有隋開皇六年碑其佛殿規制與今絕異僧云此唐物也寺又有閣九楹五層崇一百三十尺宋開寶四年建中有銅

觀音像崇七十有三尺予與李君登閣其二層西壁有宋人畫太祖出師之像僧言宋祖仕後周時嘗駐兵寺中也寺又有古井泉甚甘潔在五季時嘗出光祿淘之獲銅甚多觀音像井中銅所鑄也

七日發真定五里渡漳沱河其水自鴈門來經靈壽縣至直沽入於海時大旱水才沒脛舟人云水大時濤浪頗惡未易渡也六十里至藥城縣其地本春秋時晉欒武子封邑縣

西三里有藥武臺遺址猶在不及登

八日發藥城四十里至趙州州衙南門壘石爲之卽古之望漢臺蓋取純築此以望光武之至有望漢臺三字石刻猶在門上州南五里度石橋橋跨洹河人言唐僊人張果嘗乘驢過此驢失足今足尾之跡宛然石上前石有窪然若帽形者果仆地時帽落處也唐書方伎傳載果事甚異此固不足怪也四十五里道左卧碑剔土視之乃元至治二年重修

漢光武廟記廟今廢但存柱礎礎旁有石人三皆中斷十五里至栢鄉縣

九日發栢鄉三十三里渡尹村河二十八里至內丘縣縣學訓導池鱗來謁言嘗修縣志予問縣中古跡池言郭巨故居在縣東金隄村有石塔二名郭巨塔馮唐故居在縣西南十五里名馮唐村又言鵲山在縣西六十里上有扁鵲祠每歲三月一日鄉民祈禱來集者數千萬人三日乃已縣官收其施金爲修

祠之費又言元史臣王鶚有重修鵲山廟碑謂趙簡子病五日不知人扁鵲告以秦繆公事簡子病愈卽中丘之蓬山賜地四萬畝時往來其間漢唐以來像而祀之五季碑刻已有王稱未知封自何代宋嘉祐初神宗不豫遣使詣廟求醫使未至而瘳降璽書賜號神應離內丘十五里西望林木鬱然輿夫言其中居民數十家卽所謂馮唐村也四十里有泉湧出橋下聲如轟雷名達河泉予行旬日

困於塵土得此不覺灑然五里至順德府太守韓君出迓

十日早訪韓君府東有三賢祠謁之三賢者春秋義士豫讓唐丞相魏徵宋璟此地相傳即趙襄子之故宮三十五里至沙河縣

十一日發沙河三十二里渡洛河二十七里道旁有呂翁祠相傳唐開元中盧生過道士呂翁所謂黃梁夢者即其地祠久廢正統五年重建中塑呂洞賓像其前殿之像爲鍾離

先生後室有盧生睡像蓋後之人誤以呂翁爲洞賓洞賓唐海州刺史讓之子開元時尚未生此之呂翁當別是一人予嘗見唐沈既濟有枕中記叙其事甚詳惜不刻於此二十里至邯鄲縣城外東行半里登趙武靈王叢臺其址舊崇幾二十尋辛未冬劇賊經此亂矢射城中縣官去其崇之半今猶屹然如

十二日發邯鄲西南十五里至趙簡子墓其四周皆土堤崇可丈餘周二十里土人呼趙

王城城舊有四門從東門入里許登平岡號曰陵臺即簡子葬處出東門十五里始得大道則已越河南磁州界十里蓋邯鄲至是三十里矣十里過臺城岡至車騎關小憩巡司三十里至磁州知州事董君懌出迓董君子同鄉人過之留飲

十三日發磁州其南門有曹操疑塚七十二處大小碁布凡二十里至講武城而止講武城者亦操所築練兵之處遺址宛然其下爲

漳河渡河六十里將至彰德府太守趙君一清偕其同僚及縣官出近城之外有橋跨安陽河近爲山水所衝渡河至府城分巡僉憲何君來會追暮訪何君於分司入尉遲迥祠迥仕後周爲相州總管與楊堅將韋孝寬戰死故州人祀之祠之碑唐顏魯公撰蔡有隣八分書二絕也

十四日發彰德西南三十五里西望有丘陵然即古之羗里紂囚文王處也迂路登之其

上有文王祠中爲塑像東西壁有宋人題名及元學士王盤詩石刻姜里土人謂之姜里城舊嘗讀郝陵川集見有姜里廟碑謂圯復之餘猶峻絕屹然以其隘小而逼土實其中幾與堞平即今之土丘是也十里至湯陰縣過司空李公第訪其子不值蓋予司空舊屬也

十五日謁岳武穆祠蓋武穆爲湯陰人正統間吾鄉武功伯徐公嘗以御史巡視其地請

於朝祀之徐公有碑立祠中縣西半里謁稽侍中祠侍中晉永興中從惠帝北征遇成都王穎兵敗以身捍帝遇害遂葬於此祠有韓魏公碑剝裂不可讀祠之後高丘即侍中墓也西南行野田中三里出大道五十五里入衛輝府淇縣界西望太行山甚邇山綿亘數千里峯巒巖谷雖異其名然總呼曰太行其在衛輝者凡二百里爲中州巨鎮十里道側有碑乃成化中建衛武公祠記祠在縣西

二十五里所謂淇園者即其地一里有碑什地刻衛武公淇澳竹六大字有石梁脊與土平人行其上云即淇水所流之處詩云瞻彼淇澳萋竹猗猗是也十五里至淇縣

十六日發淇縣西南三里渡新脛河水不甚深廣昔紂斬朝涉之脛於此故名二十七里道旁古祠俗呼爲張相公廟入門讀元人碑謂漢博望侯張騫葬地道士出元郡人王文定公集上有廟記則以爲魏曲農高府君所葬因其地有博望山故後之人誤以爲騫也西南五里又折而西五里至殷太師比干祠祠有方石刻殷比干墓四字字徑八寸其墓字已剝似篆非篆元吾丘子行精於篆籀嘗定爲漢人之筆見其所著學古編然人鮮有知者祠又有武王封比干銅盤銘元延祐中重刻又有唐碑二宋碑一祠之後即比干墓高可三丈廣五畝道士言昔有古木不存者數十年矣南行十里至衛輝兵備劉僉憲濟

民予同年進士攜酒酌予驛中已而劉太守亦來會五十里至新鄉縣

十七日發新鄉西南五十里至獲嘉縣午憩察院其旁爲按察分司司之後有梳粧臺故址人言昔紂嘗巡幸築行宮於此臺即妲己梳粧之所予弗信取縣志閱之果載其說五十里至修武縣

十八日發修武西南五十里至武陟縣二十里經二仙祠祠有宋人及金元人碑言二仙

爲壺關岳相之女師紫雲隱者得仙唐宋皆有封號其地武陟之中李村也十里至清化鎮鎮屬河內縣居民千餘家有文宣王廟謁之廟碑元學士閻文康公譔國朝正統中增四配十哲塑像蓋義塾也三十里渡丹河近河多田園民皆引水灌溉爲利甚博懷慶太守趙同年鳴教出迓五里渡沁河橋河之上有川月亭府官新建以息使客五里至覃懷驛鳴教携酒來酌一更別去

十九日鳴教復携酒來晚陪予至沁河北岸謁漢孝子郭巨墓墓上有祠中爲塑像一尼僧守之考之巨林縣人內丘有其故宅不知何緣葬此

二十日發懷慶西南五十里至孟縣參政劉君用彰以分守寓茲地聞予至來顧兼惠書扇頭之御史陸君鎮卿以巡按至陸君予鄉人且舊同僚亦來顧晚訪劉大參既而訪巡按君留飲察院

二十一日孟縣南門謁潘安仁祠蓋安仁嘗爲河陽令今之孟縣古河陽也西行十里登紫金山黃河橫亘其前殊爲勝絕相傳唐太宗嘗獵於此山有寺創於唐垂拱中見石幢上字刻五里謁韓文公墓舊有皇甫持正碑今已不存墓高一丈周可十丈前有室三楹爲有司享祀之所二十里渡黃河河廣可二里值無風水平如掌抵岸則孟津縣也縣東一里有觀兵臺昔武王伐紂觀兵於此其遺

址半淪於河四里經叩馬村夷齊諫武王伐紂即其地後人嘗爲立祠久廢今重建

二十二日雨留孟津王巨臣縣令以新揭漢光武廟碑來觀蓋光武墓在縣西三十里碑爲宋開寶六年行右補闕蘇德祥誤行太僕寺丞孫崇望書歷五百有餘歲完好如初刻者

二十三日發孟津西行三十里登北邙山山跨偃師鞏孟津三縣綿亘餘四百里其頂甚

夷爲土人耕種東漢諸帝及唐宋名臣多葬於此晉張協賦云墳壠嶮疊墓布星羅可謂能道其實然碑刻無一存者後之人不能考也二十里下山十五里過漣橋漣水經其下河南之水舊有名者曰伊洛漣澗書所謂澗水東漣水西即此五里至河南府貳守黎君廷表予南都舊僚也攜酒酌予驛中入昏乃去

二十四日出河南西關三里謁二程先生祠

中爲牌位兩廡列程氏門人廷表偕太守何君道亨置酒於此飲散觀五鳳樓舊址二里經洛陽故城昔周公所營東漢西晉後魏咸都於此其址猶在三里道左有碑巍然曰大元齊王墓二里度石梁澗水經其下十五里至孝水土人稱王祥水謂即其剖冰求鯉處然已涸第存水之名耳土岡上有石刻大字曰晉太保孝王祥之碑其陰刻元人詩文不暇讀十五里懋磁澗二十五里土山之下有

碑其刻曰秦相甘羅廟故址土人指碑後山上即其地且云羅之墓亦在於是棘鉤衣不可登三里澗水之南疊石屹然臨水者人曰此太公釣臺也太公聞其釣渭恐未嘗至此渡澗水經函谷關故址蓋函谷本在靈寶縣南十里漢武帝時嘗移於此已而至新縣二十五日發新安西行二十里遊王喬洞其石皆土所成取而破之木葉之形交錯其間文理具在若雕刻者不特一石爲然衆石皆

然洞之上二木亦皆化石而一木復產枝葉
予見之始而驚終乃大駭以爲穹壤間之所
未有使人爲予言予安能信今試以語人若
舍予亦未必不以爲妄碑言昔神仙大丹之
成土木皆化爲石此說似爲得之但不可與
俗人道耳八里經青龍山山有佛廬澗水環
流其下極可觀二十里微雨憩義昌驛其地
昔三老董公遮說漢高帝之所雨霽四十里
至澠池縣兩復作

二十六日發澠池西行一里登會盟臺昔秦
昭王與趙惠王會盟於此臺半已傾圯其前
隔水一里有碑刻會盟臺三大字五十里上
金銀山人云舊嘗產金銀故名山多亂石肩
輿頗費推挽二十里下山至硤石驛作詩一
律書驛中

二十七日硤石山行五里謁老子祠西行五
十二里道側有碑大書曰魏野草堂蓋野嘗
隱居於此三里至硤州殷僉憲文濟時寓其

地聞予至來顧同午食晚與文濟同出觀譙
樓下二鐵人顏知州如環陪行言州志載鐵
人銘其序云鐵金屬土其母水其子也後之
人慮河之奔決潰溢也乃歛其母鑄爲人形
俾水得金而不橫土得金而益壯水火成質
子母相顧無奔決潰溢之患也旣而謁召公
祠陝爲公分治之地州人祀之宜矣出西門
三里登雞足山山據黃河之上中有河上公
祠覽眺清絕頗知州送酒鄉貢士楊昭亦携
酒至與文濟同酌河濱

二十八日文濟送予出陝州西門觀蝦蟆泉
韓文公有詩見集中其上有龍王祠顏知州言每旱歲
於此禱雨有大蝦蟆浮水面則雨隨至別文
濟六十里至靈寶縣謁關龍逢祠遂訪許廷
綸同年出靈寶西門二里渡弘農澗十里有
碑曰夏直臣關龍逢之墓墓去碑可里四十
三里道旁碑上刻黃帝鑄鼎處五大字土人
指土山上云即黃帝鑄鼎處五里至閿鄉縣

二十九日發閬鄉西行三十里潼關兵備憲副張同年汝誠遣人并鼓樂來三十里至潼關關據險隘一夫可守也張君出迓同入玉皇觀訪聶憲副廷罷午張君張燕城西門樓陪燕者聶君旣而移酌黃河之上打魚觀射盡歡而散

使西日記卷上

使西日記卷下

姑蘇都 穆

六月一日聶張二君携酒送予出潼關西五里飲蓮池上遂別二里土阜周匝若城遺址人云此關羽養瘡城也三里謁漢太尉楊震墓其左右竝列凡六墓歐陽公集古錄謂楊氏世葬閬鄉墓側皆有碑今其存者四乃太尉沛相高陽繁陽令也予按太尉即震沛相不知其名高陽令震之孫名著繁陽令震長子富波相牧之子其名不傳則沛相高陽繁陽固皆葬此今四碑已亡墓前唯一新碑刻太尉傳其三墓則無可攷嘗記舊閱蔡中郎集見其中有司空楊秉臨晉侯楊賜二碑然皆不書葬地此三墓者豈即牧與秉賜輩邪二十五里入西嶽廟廟極壯麗其前土臺之上有樓凡一百七十楹其中樓特高大正與嶽對廟中古木森列唐栢五株恠甚其一大者四人圍之碑有唐明皇御製文其崇五丈

字徑八寸經黃巢之火今存惟十數字廟又有漢郭香隸字碑及六朝唐宋人碑甚多昔之人聚其小者壘之若雙闕然道士呼爲石闕五里至華陰縣

二日發華陰西行十一里迂路至班家庄謁漢定遠侯班超墓墓已爲民居在短垣之內此亦可見陝人質直無拘忌也離班庄出大道二十四里折而南登鳳居山山二名鳳骨其巖有永慶禪院老僧云唐開元中有鳳逐二龍至此龍墮地化泉二道鳳憤而死其一龍被鳳爪傷流血泉色遂赤至今院中猶飲龍泉赤泉唯灌地而已僧又云鳳喜食龍腦故龍畏之鳳死時山之僧以石函瘞其骨於山巔壘碑爲塔覆之山因以名景泰癸酉鄉之人因築城逼於州官盡取塔碑以去而石函始露其僧小年猶及見之石上刻字云景祐四年重修啓函鳳脰骨長二尺圍可六寸股骨長一尺五寸圍如脰骨其潔如玉龍之畏

鳳昔所未聞斯亦異矣二十四里至萼州東關謁汾陽王祠一里至州治出州西門謁鄭桓公墓桓公名友聞周宣王庶弟也既而謁寇萊公祠蓋汾陽萊公皆華人今皆著祀典四十餘里道旁一碑穹然乃唐兵部尚書王忠嗣墓十八里至渭南縣

三日發渭南西行七十里至臨潼縣驪山在目出縣南半里即抵其麓浴於溫泉泉人呼爲官池上有室三楹扁額甚嚴蓋非貴人不

得浴此其四周甃石如玉環狀中一小石上鑿七竅泉由是出室之內有古今石刻近知縣事者聚之壘於門外儼若屏障溫泉之左有泉曰混池以浴小民東行即華清宮故址上有三清殿前卧一巨鍾視其款乃華清物又有二碑右爲後魏溫泉頌惜多剝落左刻金尚元龍草字南上爲玉女閣下有方池即溫泉發源處飲之可以已疾每秋暮人取未熟柿投其中經宿食之不澁其左爲玉女洗

頭池沐髮者多去瘡蟲山之半平坡朝元閣舊建於此山左肩曰東繡嶺右肩曰西繡嶺當時林木花卉之盛類錦繡然故名又上爲老君殿舊云天寶七年十月老君見於朝元閣南玄宗於其處立降聖觀琢白玉石爲像今之所存是也殿壁繪唐從臣之像殆當時人筆其西南有泉名飲鹿槽今涸又上爲老母殿老母即唐李筌所從受陰符者山之巔舊有烽火樓昔周幽王欲悅褒姒舉烽火以聚諸侯之處下山東行八里折而南二里至秦始皇陵自其南登之二丘並峙人曰此南門也右門石樞猶露土中陵高可四丈昔項羽黃巢皆嘗發之其地老人云始皇葬山之中此特其虛塚老人之言當必有所授也四日發臨潼西行二十里謁唐段太尉秀實祠二里有斷碑覆草間人云碑後五里即太尉墓也十里至灞橋橋爲昔人送別之所又呼爲銷魂橋以迎新送舊至此黯然也二十

里憇岡極寺寺有宋千枝栢二其枝自根業生婆娑可愛又有一古栢三人圍之亦宋物逼暝至西安府同年沈憲副仁父朱憲副升之舊僚田主事有年皆來顧有年獨留酌

五日早朝 秦王賜宴都憲趙公克正三司諸君及太守陸續來顧午與有年出城南門遊慈恩寺寺唐高宗爲文德皇后建中有鴈塔七成倣西域窰塔波制其崇凡三百尺唐進士登科者舉題名於塔予早年猶及見題

名石本今塔中石已不存所存唯褚河南書三藏聖教序及高宗述聖記二碑予題名塔下出慈恩南行尋曲江池則已爲民田詢之地人僅彷彿其處耳
六日都憲公治具延予遊唐興慶廢宮出城東門一里即其地蓋唐之南內也宮故址隆然而高四周皆古栢壽藤其右稍上爲沈香亭又上爲貴妃梳粧樓與興慶柱礎完然俱存又有景龍池其水已涸犁而爲田陪飲者

沈憲副也入城憲副邀都憲公及予復飲西安府學徧觀歷代碑刻

七日別都憲公及三司諸君午後行值雨憇城隍廟長安咸寧兩縣令來兼饋酒果田有年聞予坐雨携酒至遂同夜酌

八日發西安西行五里登漢未央宮故址五里經楊家村即漢之長安城也隋遷都龍首川此城遂廢又俗呼曰楊廣城蓋煬帝弑父士國民斥其名宜也四十里至咸陽縣正使

崇信公聞予至出迓就酌予察院午後縣丞并學之訓導隨予出城南門十五里至畢原謁周成王陵北行三里謁文王陵武王陵在其後折而東北三里謁周公墓又南四里謁康王陵其東半里謁漢昭帝陵按三禮圖云文王之葬居中武王爲昭居左成王爲穆居右康王恭王以下子孫夾處而葬以今觀之殊爲不然三代之禮至周大備而其葬若此三禮圖之說又不知何據不可曉也

九日發咸陽東北十二里謁漢元帝陵西行半里經漢王氏五侯墓十七里謁蕭相國祠祠半頃圯其中塑像亦已剝落四十里至醴泉縣縣官送六駿圖石本石今在縣中六駿者唐太宗平宋金剛劉闢竇建德薛仁果時所乘馬也每馬太宗自爲之贊歐陽詢書唐史稱劉黑闥薛仁果與此不同當以石本爲是四十里至乾州訪正使崇信公於察院夜酌

十日發乾州西北十里望梁山

孟子云太王去邠梁山

此即謁唐高宗陵陵前石人馬各二一石人已沒土中過此二丘陵然人曰此南門舊址入門石表二飛龍馬二方石上刻爲畢方之形者二石馬十石人二十石碑二其左無字後人多刻名於上其右墮地碎爲數段不可讀又入門乃陶甕所甃其半已傾左右石人爲回紇狀者六十有四然多無首其上即高宗陵武氏與之合葬陵右下其土中斷深入陵中人曰此黃巢掘墓溝也唐逸史載武氏墓

爲巢所發賊見其顏貌如生競汗之觀此其信然邪七十里至永壽縣

十一日發永壽西北七十里至邠州出城南門山上有太王城遺址俗呼太王山北行半里與州士四人謁姜嫄祠其旁有唐高郢碑後左偏原上有履迹坪即姜嫄履巨人迹所在坪下石洞出泉清甚名錦谷泉諸士酌予予題名石上

十二日知邠州事齊君請爲石龍渦之遊

食典卿黃士兩劉君出州西門齊君已候道左四里渡涇河河廣可十丈深三尺從者皆攜衣涉之昔漢武帝祀甘泉至涇橋有女子浴於水乳長七尺侍中張寬曰天星主祭祀齋戒不潔則女人星見即此水也五里由小谷入山盤旋以上石壁千尺殊形詭狀而懸溜點滴霑人衣袂緣厓行路僅容足數百步至五龍神祠中有元延祐三年禱雨有感碑所謂石龍渦者在山之巔以其斗峻人鮮能